

四庫全書

集部

欽定四庫全書

集部
宋元詩會卷二

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣許紹錦

欽定四庫全書

集部八

宋元詩會

總集類

提要

臣等謹案宋元詩會一百卷

國朝陳焯撰焯字默公桐城人順治壬辰進士
選庶吉士以耳聾告歸不復出覃思著述取
所見宋元詩人之作輯為此編每人各紀其
爵里本末于下以備考訂雖甄錄篇什無多

而撫拾家數頗為廣備王士禎香祖筆記稱康熙甲子奉使南海次相城焯過其客署二從者背負巨囊揖罷即呼具案顧從者取囊書數十大冊羅列案上指示士禎曰此吾二十年來所輯宋元詩會若干卷將待君決擇之然後出而問世云云蓋即指是書而言是其卷帙本極繁富而今刊行之本僅止此數或經士禎鑒別之後焯重加釐定而復為刪繁

以就簡者然上下數百年間詩家林立其源
流姓氏一一粲然以視吳之振顧嗣立兩家
雖浩博不及之而梗概亦已略具矣乾隆四
十五年十月恭校上

總纂官

臣紀昀
臣陸錫熊
臣孫士毅

總校官
臣陸費墀

欽定四庫全書

宋元詩會卷一

兵部主事陳焯編

宋太祖

稗史載宋師圍金陵南唐使徐鉉來欲用口舌解
圍鉉盛稱其主博學多藝有聖人之能因誦所為
秋月詩宋祖失笑曰此寒士語耳吾不道也鉉未
心服因以上請侍臣皆驚懼相目宋祖徐曰吾微
時自秦中歸道華山下醉臥田間覺而月出有句
曰未離海底千山黑纔到天中萬國明鉉大驚殿
上稱壽夫開創之主神智過人區區吟事固無足
道然以一人而肇數百載文明之治其氣象聲口

得諸英分函蓋一世有不期然而然者漢龍準大風之歌明高皇神鳳慈烏之操後先一揆雲漢天章自非刻鏤組織所能幾也

初日詩

太陽初出光赫赫
千山萬山如火發
一輪頃刻上天衢
逐退羣星與殘月

宋仁宗

帝於進士聞喜宴必製詩以賜之如恩袍草色動仙籍桂香浮皆警句也嘉祐初梅龍圖摯出守杭州亦拜賜章凡數首其首篇曰地有吳山美東南第一州則見之歐文有美堂記餘惜不盡傳爾

賞花釣魚

晴旭輝輝苑籞開
氤氲花氣好風來
游絲罥絮縈行仗
墮蕊飄香入酒杯
魚躍文波時潑刺
鶯留深樹久徘徊
青春朝野方無事
故許遊觀近侍陪

賜劉沆輓章

早富經綸業終成
輔弼功立朝無黨
比為國盡公忠此
日悲遺直誰人嗣
匪躬深嗟亡一鏡
何以慰予衷

宋神宗

神宗深於風雅頗自韜晦未嘗輕露其能而結構
完密蘊義纏綿如輓大公主三章則直詩人之詩
不得以帝王篇什目之也蓋汴宋慶厯嘉祐間當
人文之極盛臣下製作傳聞宮禁名章秀句服習
宏多雖曰聰睿性成亦薰染陶冶之力有以致
之乃論者比諸周穆漢祖其風調為不侔矣

秦國大公主輓章三首

海濶三山路香輪定不歸
帳深空翡翠珮冷失珠璣
明月留歌扇殘霞散舞衣
都門送車返宿草自芳菲
曉望城西道靈車去漸遙
春風空魯館明月斷秦簫
塵入羅衣暗香隨玉篆
銷芳魂飛北渚那復可為招

慶自天源發恩從國愛申歌鐘雖在館桃李不成春水
折徒還沁樓高已隔秦區區會稽市無復獻珠人

宋徽宗

道君無所不能何有於詩然靡靡之音識者知其
不競藝林所錄惟禁苑荔枝一首音節稍壯顧紅
塵一騎害馬勞生唐室妖風奚堪髣髴而未年之
識早寓於此存詩者所以志戒也若其篇什則無
焉取焉

禁苑荔枝結實賜燕帥王安中

葆和殿下荔枝丹文武衣冠被百蠻思與近臣同此味

紅塵飛鞚過燕山

幸徐常廬

人生何事厭囂塵
汎宅浮家冬復春
今日暫來猿鶴語
他年應召白雲人

宋孝宗

宋南渡令主惟一孝宗其見諸歌吟者雄緊清厲
氣概岸然雖上抑於德壽下沮於僉人而厥志為
可尚矣說者謂在藩邸時得力於
尹焞朱震輩之講習豈不然乎

春晴

春風歸草木曉日麗山河物滯欣逢泰時豐自此多神
州應未遠當繼沛中歌

題宮中泠泉堂

孰云人力非自然千巖萬壑藏雲烟上有崢嶸倚空之
翠壁下有潺湲漱玉之飛泉一堂虛敞臨佳沼密蔭交
加森翠葆山頭草木四時芳閱盡歲寒常不老

玉津園賜和洪邁

春郊柔綠遍桑麻小駐芳園覽物華應信吾心非暇逸

頻回晴意絕咨嗟每思富庶將同樂敢務漁畋謾自誇
不似華清當日事五家車騎爛如花

新秋過雨述懷

平生雄武心覽鏡朱顏在豈惜常憂勤規恢須廣大

金山寺

屹然天立枕中流彈壓東南二百州狂敵來臨須破膽
何勞平地戰貔貅

范質

字文素大名宗城人生之夕母夢神人授以五色
筆後唐長興四年舉進士為忠武軍節度推官歷
官翰林學士知制誥周祖征叛每覽其誥勅處分
軍事輒歎曰宰相器也周廣順初加拜中書侍郎
平章事集賢殿大學士兼知樞密院事進位左僕
射世宗不豫入受顧命恭帝即位加開府儀同三
司封蕭國公及宋太祖北征至陳橋為六師推戴
質率王溥等遂降階稱臣焉加兼侍中罷知樞密
乾德初帝將有事圜丘以質為大禮使進封魯國
公卒年五十四質廉介自持兩朝皆任宰輔不事
生產太宗嘗稱之曰近時宰相清慎無出
質右者惜欠周世宗一死耳有集三十卷

戒兒姪八百字

昨得謝課書希於京秩之中更與
遷轉余以諸兒姪輩生長以來未

諳外事艱難損益懽然
莫辨抒古詩一章曉之

去年初釋褐一命到蓬丘

謂謝課

青袍春草色白紵棄如

仇適會龍飛慶王澤天下流爾得六品階無乃太為優
凡登進士第四選升校讐登官十五考叙階與爾儔如
何志未滿意欲凌雲遊若言品位卑寄書求我求省之
再三歎不覺淚盈眸吾家本寒素門地寡公侯先子有
令德樂道尚優游生逢世多僻委順信沉浮仕宦不喜
達吏隱同莊周積善有餘慶清白為貽謀伊余奉家訓
孜孜務進修夙夜事勤肅言行思悔尤出門擇交友防

慎畏薰蕕省躬常懼玷恐掇庭闈羞童年志於學不墮

為箕裘二十中甲科頰尾化為虬

二十三進士及第今舉全數

三十

入翰苑

時三十三

步武向瀛州四十登宰輔

年四十一

貂冠侍冕

旒備位行一紀將何助帝猷既非救旱雨豈是濟川舟

天子未遐棄日益素餐憂黃河潤九里草木皆寢漬吾

宗凡九人繼踵升官次門內無白丁森森朱綠紫鵷行

洎內職亞尹州從事府掾監省官高低皆清美悉由僥

倖升不因資考致朝廷懸爵秩命之曰公罷才者祿及

身功者賞於世非才及非功安得專厚利寒衣內府帛
飢食太倉米不蠶復不穡未嘗勤四體雖然一家榮豈
塞衆人議顚顚十目窺齷齪千人指借問爾與吾如何
不自媿戒爾學立身莫若先孝弟怡怡奉親長不敢生
驕易戰戰復兢兢造次必於是戒爾學干祿莫若勤道
藝常聞諸格言學而優則仕不患人不知惟患學不至
戒爾遠恥辱恭則近乎禮自卑而尊人先彼而後已相
鼠與茅鷁宜鑑詩人刺戒爾勿放曠放曠非端士周孔

垂名教齊梁尚清議南朝稱八達千載穢青史戒爾勿
嗜酒狂藥非佳味能移謹厚性化為克險類古今傾敗
者歷歷皆可記戒爾勿多言多言者衆忌苟不慎樞機
災危從此始是非毀譽間適足為身累舉世重交游擬
結金蘭契忿怨容易生風波當時起所以君子心汪汪
淡如水舉世好承奉昂昂增意氣不知承奉者以爾為
翫戲所以古人疾蘧蒨與戚施舉世重任俠俗呼為氣
義為人赴急難往往陷刑死所以馬援書殷勤戒諸子

舉世賤清素奉身好華侈肥馬衣輕裘揚揚過閭里雖
得市童憐還為識者鄙我本羈旅臣遭逢堯舜理位重
才不充戚戚懷憂畏深淵與薄冰蹈之惟恐墜爾曹當
憫我勿使增罪戾閉門斂蹤跡縮首避名勢名勢不久
居畢竟何足恃物盛必有衰有隆還有替速成不堅牢
亟走多顛躓灼灼園中花早發還先萎遲遲澗畔松鬱
鬱含晚翠賦命有疾徐青雲難力致寄語謝諸郎躁進
徒為耳

徐鉉

字鼎臣揚州廣陵人十歲能屬文不妄遊處與韓
熙載齊名仕吳為校書郎又仕南唐李景父子宋
師圍金陵李煜遣鉉求緩兵及隨煜入覲太祖責
之聲甚厲鉉對曰臣為江南大臣國亡罪當死不
當問其他太祖歎曰忠臣也事我當如李氏命為
太子率更令太平興國初直學士院從征太原師
還加給事中八年出為右散騎常侍遷左常侍淳
化二年坐尼道安誣以姦私貶靜難行軍司馬卒
年七
十六

寒食日作

厨冷烟初禁門閉日更斜東風不好事吹落滿庭花過

社紛紛燕新晴淡淡霞京都盛遊觀誰訪子雲家

中書相公谿亭閒宴依韻

李建
勳

雨霽秋光晚亭虛野興迴沙鷗掠岸去溪水上堦來客
傲風欹幘筵香菊在杯東山長許醉何事憶天台

和州酬江中丞見寄

賈傅南遷久江關道路遙北來空見雁西去不如潮鼠
穴依城社鴻飛在次寥高低各有處不擬更相招

泰州道中却寄東京故人

風緊雨淒淒川迴岸漸低吳州林外近隋苑霧中迷聚
散紛如此悲歡豈易齊料君殘酒醒還聽子規啼

送高先輩南歸

鄉國悲前事風光屬後生名從天上得身入故都行草
色初裁綬鵬飛不算程自憐枯朽思相送剩含情

送龔明府九江歸寧

茂宰隨官去扁舟著綵衣湓城春酒熟廬阜野花稀解
纜垂楊綠開帆宿鷺飛一朝吾道泰還逐落潮歸

和致仕張尚書新創道院

梓澤成新致金丹有舊情挂冠朝睡足隱几暮江清藥
圃分輕綠松窓起細聲養高寧厭病默坐對諸生

尚書時有

瘖疾

京口江際弄水

退公求靜獨臨川揚子江南二月天百尺翠屏甘露閣
數帆晴日海門船波澄瀨石寒如玉草接汀蘋綠似烟
安得乘槎更東去十洲風外弄潺湲

宿蔣帝廟明日遊山南諸寺

便返城闌意未甘更從山北到山南
花枝似雪春雖半
挂魄如眉日始三
松蓋遮門寒黯黯
柳絲妨路翠參參
登臨莫怪偏留戀
遊宦多年事事諳

和殷舍人蕭員外春雪

萬里春陰乍履端
廣庭風起玉塵乾
梅花嶺上連天白
蕙草堦前特地寒
晴去便為經歲別
興來何惜徹宵看
此時鵷侶皆閒暇
贈荅詩成禁漏殘

秋日雨中與蕭贊善訪殷舍人於翰林座中作

野出西垣步步遲秋光如水雨如絲
銅龍樓下逢閑客紅藥堦前訪舊知
亂點半滋承露處碎聲因想滴篷時
銀臺鎖入須歸去不惜餘歡盡酒卮

除夜

寒燈耿耿漏遲遲送故迎新了不欺
往事并隨殘曆日春風寧識舊容儀
預慙歲酒難先飲更對鄉儺羨小兒
吟罷明朝贈知己便須題作去年詩

正初答鍾郎中見寄

高齋遲景雪初晴
風拂喬枝待早鶯
南省郎官名籍籍
東隣妓女字英英
流年倏忽成陳事
春物依稀舊有情
新歲相思自過訪
不煩虛左遠相迎

賀殷游二舍人入翰林江給事拜中丞

清晨待漏獨徘徊
霄漢懸心不易裁
閣老深嚴歸翰苑
夕郎威望拜霜臺
青綾對覆蓬壺晚
赤棒前驅道路開
猶有西垣廳記在
莫忘同草紫泥來

送歐陽太監遊廬山

家家門外廬山路惟有夫君乞假遊
案牘乍拋公署晚林泉已近洞天秋
海潮盡處逢陶石江月圓時上庾樓
此去蕭然好長往人間何事不悠悠

和蕭郎中小雪日作

征西府裡日西斜獨試新爐自煮茶
籬菊盡來低覆水塞鴻飛去遠連霞
寂寥小雪閒中過斑駁輕霜鬢上加
算得流年無奈處莫將詩句祝蒼華

宣威苗將軍貶官後重經故宅

蔣山南望近西坊，亭館依然鎖院牆。天子未嘗過細柳，

將軍尋已戍燉煌。

史萬歲嘗謫戍燉煌

歌傾怪石山無色，零落圓

荷水不香。為將為儒皆寂寞，門前愁殺馬中郎。

送應之道人歸江西

曾騎竹馬傍洪涯，二十餘年變物華。客夢等閒過驛閣，
歸帆逆羨指龍沙。名題小篆矜垂露，詩作吳吟對綺霞。
歲暮定知迴未得，信來憑為寄梅花。

寄江州蕭給事

夕郎憂國不憂身
今向天涯作逐臣
魂夢暗馳龍闕曙
嘯吟閒繞虎谿春
朝車載酒過山寺
諫紙題詩寄野人
惆悵懦夫何足道
自離羣後已同塵

陪王庶子遊後湖涵虛閣

東宮園

縣圃清虛乍過秋
看山尋水上茲樓
輕鷗的的飛難沒
紅葉紛紛晚更稠
風卷微雲分遠岫
浪搖晴日照中洲
躋攀況有承華客
如在南皮奉勝遊

王三十七自京垂訪作此送之

失鄉遷客在天涯
門掩苔垣向水斜
只就鱗鴻求遠信
敢言車馬訪貧家
烟生柳岸將垂縷
雪壓梅園半是花
惆悵明朝樽酒散
夢魂相送到京華

寄外甥苗仲武

放逐今來瘴海邊
親情多在鳳臺前
且將聚散為閒事
須信華枯是偶然
蟬噪疎林村倚郭
鳥飛殘照水連天
此中惟欠韓康伯
共對秋風詠數篇

送楊郎中唐員外奉使湖南

江邊微雨柳條新，握節含香二使臣。
兩綬對懸雲夢日，方舟齊泛洞庭春。
今朝草木逢新律，昨日山川滿戰塵。
同是多情懷古客，不妨為賦吊靈均。

和表弟包穎見寄

平生中表最情親，浮世那堪聚散頻。
謝朓却令歸省閣，劉楨猶自臥漳濱。
舊遊半似前生事，要路多逢後進人。
且喜新吟報强健，明年相望杏園春。

送彭秀才

賈生去國已三年短褐閒行皖水邊
盡日野雲生舍下有時京信到門前
無人與和投湘賦媿子來浮訪戴船
滿袖新詩好回去莫隨騷客醉林泉

和蕭郎中午日見寄

細雨輕風采藥時
寒簾隱几更何為
豈知澤畔紉蘭客
來赴城中角黍期
多罪靜思如剉蘖
赦書纔聽似含飴
謝公制勝常閒暇
願接西川敵手碁

和翰長聞西樞赴鄰居夜宴

開筵別有鄰居興
卜夜應憐禁漏長
舊友不期先命駕
新姬憑寵剩傳觴
香烟結霧籠金鴨
燭焰成花照杏梁
京邑衣冠多勝賞
鱸魚爭敢道思鄉

和蕭少卿見慶新居

湘浦懷沙已不疑
京城賜第豈前期
鼓聲到晚知坊遠
山色來多與靜宜
簪履尚應憐故物
稻粱空自媿華池
新詩問我偏饒思
還念鴈鷺得一枝

題紫陽觀

南朝名士富仙才，追步東卿遂不迴。
丹井自深桐暗老，祠宮長在鶴頻來。
巖邊桂樹攀仍倚，洞口桃花落復開。
惆悵霓裳太平事，一函真跡鎖昭臺。

贈奚道士

名舍象

奚生曾有洞天期，猶傍天壇摘紫芝。
處世自能心混沌，全真誰見德支離。
玉霄辟閑人長在，金鼎功成俗未知。
他日飈輪謁茅許，願同雞犬去相隨。

九日落星山登高

秋暮天高稻穗成落星山上會諸賓
黃花泛酒依流俗白髮滿頭思古人
巖影晚看雲出岫湖光遙見客垂綸
風烟不改年長度終待林泉老此身

十日和張少監

重陽高會古平臺吟徧秋光始下來
黃菊後期香未減新詩捧得眼還開
每因佳節知身老却憶前歡似夢回
且喜清時屢行樂是非名利盡悠哉

陳侍郎宅觀花燭

今夜銀河萬里秋
人言織女嫁牽牛
珮聲嘹亮和金奏
燭影熒煌映玉鉤
座客亦從天子賜
更籌須為主人留
世間盛事君知否
朝下鸞臺夕鳳樓

柳枝辭

陌上朱門柳映花
簾鉤半捲綠陰斜
憑郎暫駐青驄馬
此是錢塘小小家

水閣春來乍減寒
曉粧初罷倚闌干
長條亂拂春波動

不許佳人照影看

趙普

字則平幽州薊人周顯德間永興軍節度劉詞辟為從事遺表薦普於朝宋太祖拔滁州宰相范質奏為軍事判官太祖嘗與語奇之陳橋之役以佐命功授右諫議大夫充樞密直學士乾德二年范質等罷相以普為門下侍郎平章事集賢殿大學士普既拜相上視如左右手事無大小悉咨決焉五年春加右僕射昭文館大學士上屢幸其第自是頗專朝政廷臣忌之會有攻其短者恩禮漸疎太平興國初入朝上書自陳預聞顧託之事太宗感悟召見慰諭拜司徒兼侍中封梁國公八年出為武勝軍節度用陳王元僖言復拜太保兼侍中未幾被疾求致仕上勉從之卒年七十一追封韓

王

雪中駕幸敝廬恭紀

貞元重數筴滕六劇霏葩漠漠初濡砌皚皚欲聚沙
閭闔銀作界宮闕玉為家調鼎慚鹽撒沾溫覺絮加
瑞凝三殿瓦欣動五雲車冰柱撐茅屋瓊枝擁翠華
微行停蹕警冷漏靜街譁具野曾無隗蟠溪豈問牙
公然門駐輦那信室蟠蝸積素堪麟畫飛黃想兔置
一庭堪曳練十道趣宣麻戎索籌先後雄材辨等差
神威殷地軸御

指落天花袞臥甘朝穩裴功敢夜誇雪山行獻瑄早晚
到星槎

張齊賢

曹州冤句人生三歲值晉亂徙家洛陽孤貧力學
少慕唐李大亮之為人故字師亮太祖幸西都齊
賢以布衣獻策及還語太宗曰吾茲行惟得一張
齊賢耳我不欲官之異時可輔汝為相也太宗擢
進士因齊賢名稍後一榜盡與京官以大理評事
通判衡州遷祕書丞改著作佐郎直史館俄改左
拾遺策兵事多奇中出為江南西路轉運使召拜
樞密直學士遷左諫議大夫雍熙三年大舉北伐
齊賢請行即授給事中知代州以軍功拜工部侍郎
淳化二年參知政事同中書門下平章事真宗

即位加兵部尚書進左僕射
年七十二薨贈司徒謚文定

豫章胡氏華林書堂

一百年來烟爨同衣冠江左慕家風兒孫歌舞詩書內

鄉黨優游揖讓中孝弟筠編爭紀錄門閭天語賜褒崇

莫將六闕方朱氏

朱敬則家門孝友三
葉旌表門標六闕

葉葉蒸蒸奉始

終

午橋新居

午橋今得晉公廬水竹烟花興有餘師亮白頭心已足

四登兩府九尚書

李昉

字明遠深州饒陽人漢乾祐舉進士為祕書郎周世宗愛其文章擢史館修撰進翰林學士宋初加中書舍人開寶二年直學士院太宗即位加戶部侍郎歷參知政事淳化五年以特進司空致仕年七十二薨謚文正生平為詩文慕白居易淺近易曉有集五十卷

題岱宗無字碑

巨石來從十八盤離宮複道滿千山不因封禪窮民力

漢祖何緣便入關

永昌陵輓詞

丹青史筆敢虛張
功德巍然軼漢唐
奠玉四回朝上帝
御樓三度納降王

錢若水

字澹成河南新安人幼聰悟十歲能屬文雍熙中
舉進士授同州觀察推官用寇準薦試翰林擢祕
書監直史館歲餘遷右正言知制誥同知貢舉以
秦邊事稱旨進翰林學士以右諫議同知樞密院
事真宗即位加工部侍郎從幸大名陳禦敵安邊
之策未幾知開封府上出手札訪以兵事改知天
雄軍節制部署深為戎將推服上謂左右曰若水
儒臣中知兵者也因遣巡撫陝西還拜鄧州觀察

使代經畧使知并州事病
卒年四十四有集二十卷

濟源縣裴公亭

裴相亭成未退身空煩舞袖與歌塵至今亭下瀟瀟竹
似對秋風怨主人

賈黃中

字媯民滄州南皮人七歲能屬文十五舉進士授
校書郎集賢校理遷左拾遺歷補闕開寶八年通
判定州判太常禮院未幾採訪嶺南太宗即位遷
禮部員外郎知昇州上李氏宮閣中遺物計直數
百萬上嘉其廉其五年召歸闕拜駕部員外郎知
制誥屢知貢舉加中書舍人兼史館修撰淳化二

年叅知政事俄罷知襄州以母老乞留京改知潭
州拜禮部侍郎兼秘書監卒年五十六黃中性畏
慎過當雖知政事無所建明故
時論不之許有文集三十卷

桂林還珠洞

赫赫威聲震百蠻肯攜筐筥涸溪山無人為起文淵問
端的珠還薏苡還

曹翰

大名人士少為郡小吏好使氣陵人不容於鄉里乾
祐初周太祖鎮鄴與語奇之以隸世宗帳下及即位
補供奉官改德州刺史宋初從征澤潞還改濟
州刺史移刺均州兼西南轉運使克成都平劍南

金史四庫全書 卷一
屢著戰功遷蔡州團練使歷桂州觀察使太平興
國四年從征太原又從征幽州拜威塞軍節度後
坐罪當棄市削官免死雍熙二年起為左千牛上
將軍淳化三年卒年六十九翰雖武人頗知詩律
宋史載其所作退將詩感動
人主有曹景宗競病之風焉

內宴應制

三十年前學六韜英名嘗得預時髦
曾因國難披金甲
不為家貧賣寶刀臂健尚嫌弓力軟
眼明猶識陣雲高
庭前昨夜秋風起羞見團花舊戰袍

柳開

字仲塗開寶進士端拱元年知廣西全州招撫蠻洞甚得其心作詩鑑一篇示之按宋史稱開為宋初文學耆儒未及其吏事即詩亦不入文鑑中因閱廣西名勝志得律詩二章併悉其治全州惠政亦一快也開自稱無碍道人

捲煙閣

古寺聳山椒公堂去不遙尋僧忘俗慮盤道出塵囂疎箔捲煙霧明眸望沈寥漁翁江上立指我在雲霄

楚南樓

洗盡蠻煙几案空登臨直見楚山雄坐當鴻鵠高飛處

身在乾坤瀨氣中
木落有情瞻北闕
霜輕無夢入西風
凭欄自是蓬瀛客
獨對蕭湘興未窮

蕭貫

江西新喻人登祥符八年進士與兄賀弟貫皆以
文名貫未第時嘗感疾夢至帝所命賦曉寒歌宮
人授之簡曰
此衍波箋也

禁中曉寒歌

寶獸宮扉三十六
宮樹迎霜紅簇簇
翠紗盤鳳珠網垂
百刻香殘隕蓮燭
炭貌呀焰壁椒馥
轆轤欲轉霏紅玉

渴烏涓涓不相續十二峴闕隱宮綠長廊四注簾旋濡
海牛壓檐風不入文華侍嬪當宸闈壺箭傳呼鑰魚濕
尚衣次進入堵墻千門萬戶聞天香九龍鼓氣號寒蜩
晬容澤玉輝晨光綵衣佩魚無左璫兩兩趨走瞻扶桑
紅萍半規出波面熠燿觚稜九霞綯鳴鞘一聲天上來
長劍高冠滿前殿

呂蒙正

字聖功洛陽人太平興國二年進士第一由通判
昇州歷知制誥拜參知政事同平章事封許國公

卒年六十

八謚文穆

罷相歸贈隱者

昔作儒生謁鎖闥今提相印出黃扉
九重鵷鷺醉中別萬里烟霄遠後歸
鄰叟盡垂新白髮故人猶著舊麻衣
雒陽漫詫多才子自嘆遭時似我稀

讀書龍門山

八灘風起浪花飛手把漁竿傍釣磯
自是釣頭香餌別此心終待得魚歸

蘇易簡

字太簡梓州銅山人少慧勤學年踰弱冠舉進士
初仕將作監丞通判昇州遷贊善以右拾遺知制
誥進秩祠部員外郎同知貢舉以妻弟匿喪克貢
坐罷知制誥俄復官淳化二年同知京朝官考課
遷中書舍人克承旨續李肇翰林志二卷以獻上
賜詩嘉之遷給事中參知政事緣與同官趙昌言
不協忿爭上前出知鄧州
移陳州卒有文集二十卷

誦聖製大言賦

聖人興兮告成功登崑崙兮展升中芳席地兮饗祖宗
天籟起兮調笙鏞日烏月兔耀文明參旗井鉞武衛森

挹北斗兮注醴醖削西華兮爲石礪飛雲湧霞炮脈騰
剗鯨腊鵬代鰈鷁迅雷三動山呼發紫電三流燿火赫
四時一同兮萬八千年泰山融兮溟海乾圓蓋偃兮方
輿穿

樂史

字永言原京兆人徙居崇仁宋初官著作郎賜緋
魚袋卒年七十八著書十二種惟寰宇記傳於世
子黃裳黃中黃目黃庭俱先後登進士黃
目登仕最久官通進銀臺兼門下封駁事

鍾山寺

千峯夾一選一選花枕泉聽泉復看竹行到鍾山前古
寺雲生屋高僧月伴禪自慚留一宿匹馬又朝天

楊朴

字契玄鄭州人太宗朝
用舉士安薦召見賦詩

應制賦蓑衣

軟綠柔藍著勝衣依船吟釣正相宜
薰葭影裏和烟臥
菡萏香中帶雨披
狂脫酒家春醉後
亂堆漁舍晚晴時
直饒紫綬金章貴
未肯輕輕博換伊

魏野

宇仲先陝州陝人也世為農母嘗夢引袂月中承
鬼得之因有妊生野及長嗜吟咏不求聞達真宗
祀汾陰野與李漬同被薦遣陝令招之
辭不至天禧三年無疾而卒年六十

冬日書事

十月天不暖前村到豈能閒聞啄木鳥疑是打門僧壞
砌平山雪空堂照瀑冰晚來因出戶差可暫攜藤

書友人屋壁

達人輕祿位居處傍林泉洗硯魚吞墨烹茶鶴避煙閒

惟歌聖代老不恨流年靜想閒來者還應我最偏

述懷

東郊魏仲先生計只隨緣任懶自掃地更貧誰怨天有
名閒富貴無事小神仙不覺流光速身將半百年

春日

春暖出茅亭攜筇傍水行易諳馴鹿性難辨鬪雞情妻
喜栽花活兒誇賽草羸翻嫌我慵拙不解彊謀生

暮秋閒望

水閣閒登望郊原欲刈禾壞檐巢燕少積雨病蟬多砧
隔寒溪擣鐘隨曉吹過扁舟何日去江上負烟蓑

啄木

爪利觜還剛殘陽啄更忙千林蠹如盡一腹餒何妨形
小過槐陌聲高近草堂豈能同燕雀惟解占高梁

閒居書事

無才動聖君養拙住山村臨事知閒貴澄心覺道尊成
家書滿屋添口鶴生孫仍喜多時雨經春免灌園

秋霽草堂閒望

草堂高迴勝危樓時節殘陽向晚秋
野色青黃禾半熟雲容黑白雨初收
依依永巷聞村笛隱隱長河認客舟
正是詩家好風景懶隨前輩却悲愁

秋日登樓客次懷張覃進士

聞說飄零亦異鄉登樓吟望益悲涼
當時欲別言難盡他日相逢語更長
蟬噪水村千萬樹雁過雲岫兩三行
明朝策蹇還無定空倚危欄到夕陽

蚤起

夜長久待得晨興
耽睡童猶喚不應
燒葉爐中無宿火
讀書牕下有殘燈
臨堦短髮梳和月
傍岸衰容洗帶冰
應被巢禽相怪訝
尋常日午起庸能

上知府寇相公

文武稟全才
何人更可陪
有官居鼎鼐
無地起樓臺
聖主詩方和
親王狀始迴
鎮臨求二陝
調燮輟三台
鳳閣頒重去
龍旌暫擁來
下車三度雨
上事數聲雷
未暇瞻

珪璧先蒙話草萊幾思趨相府恐懼復徘徊

陝州平陸縣

寒食花藏縣重陽菊繞灣一聲離岬櫓數點別州山

上王相公

聖朝宰相年年出公在中書十二秋西祀東封俱已了
好來相伴赤松遊

尋逸者不遇

尋真誤入蓬萊島香風不動松花老探芝何處未歸來

白雲滿地無人掃

酬萊公

世情冷暖由分別何必區區較異同
但得常將紅袖拂也應勝似碧紗籠

王操

太平興國初官太子中允
獻南郊頌

喜故人至

地僻無賓侶柴門晝始開
谿山寒葉落江國故人來話

舊驚霜鬢論詩滯酒杯相留喜同宿不寐曙光迴

送人南歸

相送當搖落孤舟泛渺瀰去帆看已遠臨水立多時別
浦寒鴻下空山夜鶴移他年重會面吟鬢共成絲

上李昉相公

弱冠登龍入粉闈少年清貴古來稀袖中詔草朝天去
頭上宮花侍宴歸卓筆玉堂寒漏迴捲簾池館水禽飛
三台位近猶多遜閒聽秋霖憶翠微

朝苑優游數十春
文章敵手更無人
對敝旒冕如僚友
下直門闌似隱淪
倚檻白雲供醉望
楮節黃葉落吟身
年來得意知難喻
大半門生作侍臣

宋元詩會卷一

欽定四庫全書

宋元詩會卷二

兵部主事陳焯編

鄭文寶

字仲賢初仕江南用父蔭授奉禮郎入宋李煜以環衛奉朝請文寶左右其間太平興國八年登進士第除修武主簿轉光祿寺丞獻所著文改著作佐郎通判潁州歷殿中丞陝西轉運副使李順亂蜀文寶有平賊功太宗召至闕下喜其奏對捷辨加工部員外郎以興復營田於賀蘭山下援民無功又奏減解州鹽價歲虧課額為二司所發貶藍山令真宗即位召還授殿中丞歷河東轉運使卒

年六十一有集二十卷談
苑二十卷江表志三卷

送枝江秦長官罷秩

衆論才名外親人似古人官嫌容易達家愛等閒貧解
印詩權在移風澤國春政聲誣不得慙見數鄉民

送曹緯劉鼎二秀才

旦夕春風老離心共黯然小舟聞笛夜微雨養花天手
筆人皆有曹劉世所賢柳侯重才子從此看鶯遷

溫泉

潺湲如燎嶺雲陰
玉石魚龍換古今
只見開元無事久
不知貞觀用功深
籠無解語衣無雪
堆有黃沙粟有金
惆悵羌渠負恩澤
始尤夷甫未經心

讀江總傳

行人慵過景陽宮
宮畔離離禾黍風
庭玉有花空怨白
井蓮無步莫愁紅
吟詩功業才雖大
亡國君臣道最同
爭忍暮年歸故里
綸竿迴避釣魚翁

赴闕日過石子鎮

得罪先朝出粉闥五原功業更誰知年深放逐無人識
白雪關頭一望時

孫 僅

字鄰幾上蔡人咸平元年
舉進士第一官知制誥

勘書

儒家無外事招客勘青編筆墨東西置朱黃次第研頻
憂傷點竄細恐誤流傳改易文辭正增加字數全目因
繁處倦心向注中專端坐窮今古披襟見聖賢疲勞時

舉白遊息或談玄得興忘昏旭題名記歲年棲毫思確
解廢卷恨亡篇魚魯皆判定誰人敢間然

張維

吳興人以詩名江湖間即子野尚書之父也卒年
九十一孫莘老序其詩云自得而無怨懟之語瀟
灑而有沉澹之思

孤帆

江心雲破處遙見去帆孤浪濶疑升漢風高若泛湖依
微過遠嶼彷彿落平蕪莫問乘舟客利名同一途

庭鶴

戢翼盤桓傍小庭不無清夜夢烟汀靜翹月色一團素
閒啄苔錢數點青終日稻梁聊自足滿前雞鶩漫相形
已隨秋意歸詩筆更與幽棲上畫屏

玉蝴蝶花

雪朵中間蓓蕾齊驟開尤覺繡工遲品高多說瓊花似
曲妙誰將玉笛吹散舞不休零晚樹團飛無定撼風枝
漆園如有須為夢若在藍田種更宜

聞砧

遙野空林砧杵聲淺沙棲雁自相鳴
西風送響暝色靜
久客感秋愁思生何處征人移塞帳
即時新月落江城
不知今夜搗衣曲欲寫深閨多少情

宿後陳莊

臘凍初開茗水清煙村遠郭漫行吟
灘頭斜日鳬鷺隊
枕上西風鼓角聲一櫂寒燈隨夜釣
滿犁膏雨趁春耕
誰言五福仍須富九十年餘樂太平

周密齊東野語云宋有兩張先皆字子野其一博州人天聖三年進士歐陽公為作墓誌其一天聖八年進士則吳興人也二人名姓偶同又適同時不可不知也陳振孫詩曰平生聞說張三影十詠誰知有乃翁遐想盛時生恨晚恍如身在畫圖中十詠有宿清江小舍一首破損僅存一句菰葉青青綠荇齊云

李沆

字太初洺州肥鄉人太平興國五年舉進士為將作監丞通判潭州遷右贊善轉著作郎歷補闕知

制誥入翰林為學士嘗侍宴太宗目送之曰風度
端凝真貴人也淳化三年參知政事真宗即位拜
戶部侍郎咸平初以本官同平章事上北幸命沆
留守京師肅然累加門下侍郎尚書右僕射嘗言
居相位愧無補當時惟中外所陳利害一切報罷
之此少以報國耳景德元年七月薨年五十八贈
太尉中書令謚文靖王且於沆歿後
歎其先識之遠曰李文靖真聖人也

平陽侯

為臣固不易為相良獨難孰是弼萬幾而苟懷自安鄙
侯佐漢祖規撫洵可觀其時在開創詎云擘畫殫垂死
薦平陽相倚定後艱既憚北雞驚復慮幼主孱參也急

調劑饑忍弗及餐奈何不事事醇酒以為耽后意愈無
忌帝肉曾未寒寵姬與愛子身命恣摧殘少主憂入地
呂勢積滔天藉非平與勃漢祚誰當全參實忝相位昧
者稱其賢

王禹偁

字元之濟州鉅野人世為農家九歲能文舉士安
見而器之太平興國八年登進士授成武主簿徙
知長洲縣時同年生羅處約宰吳縣日與賦詠人
多傳誦太宗聞其名召試擢右拾遺直史館賜緋
即日獻端拱箴以寓規諷未幾判大理寺緣妖尼
道安誣訟徐鉉偁論道安反坐貶商州團練副使

稍遷拜左正言歷翰林學士知審官院通進銀臺
封駁司又以議禮坐謗訕出知滁州真宗即位遷
秩刑部召還復知制誥咸平初預修太祖實錄與
宰相不協出知黃州徙蘄州卒年四十八計聞上
甚悼之有小
畜集二十卷

酬种放徵君一百韻

太歲在辛卯九月萬木落是時太陰虧占云臣道剥王
生出紫薇譴逐走商洛扶親又抱子迺運過京索敝車
載詩史病馬懸囊橐西都不敢住空負香山約闌鄉正
南路秦嶺峭如削肩輿礙巨石十步三四却妻孥亦徒

步磧礫不容脚山店益木皮煙火渾薰灼夜深聞贗虎
合家屢驚懼山泉何濛汨切裂無橋約卸鞍引羸蹄解
襪事芒屨晨瀾髮可鑒朝涉脛如斲商山六百里天設
皆碧嶠上洛在其中狴牢曾未若逐臣自可死何必在
遠惡刺史不我顧古寺聊淹泊卜居難民屯致養無精
藥知道由自寬有親彊為樂側聞种先生終南臥雲壑
長沮既躬耕元禮仍開學王績婦未娶介潔翹孤鶴之
推母偕隱教誨修天爵詩情亦嗜酒道氣不服藥田衣

剪荷芰野飯烹茝葍霧豹澤文彩冥鴻避矰繳肯從羔

雁聘唯恐簪裾縛如何宋右史斥鴳議鵬鶚

起居舍人宋維翰奏

种放隱居終南乞量才錄用頗為識者所笑

玄纁與丹詔恩禮誠非薄仍勅

京兆府敦諭辭恭恪先生戀板輿純孝心堅確散髮走

煙巒拜章謝恩渥巨材猶在澗大玉不出璞使者遂空

回軟輪何寂寞賢母召徵君庭責詞嗃嗃胡為事章句

漏名入街郭府縣污我山胥徒譟吾幄以茲近聲利安

得成高邈誓將徙窮谷庶可逃喧濁先生拜引過為壽

開樽杓陶陶又熙熙何啻聞竽籥人傳到遷客面目頽
慚作罷小識不遠當年事頭角遭時得一第遊宦何齷
齷逐羶甚蚍蜉鬬耀向熠燿宰邑乏絃歌諫垣無謇諤
便蕃朱紫綬僭忝絲綸閣方號駢駢龍已困狺狺狺待
罪始知非咄哉昧先覺一聆高世行罪髮庸可擢忍恥
賦三章塵埃寄一作望寥廓明年會恩宥量移井蛙躍靡
暇謁南山征途望西嶽黃河波洶湧白徑苔斑駁中條
圍解懸五老煙矗矗此焉為郡副烏敢事隕穫籠禽幸

未死尚且謀飲啄米呼村婢舂樵顧山童斫飼馬捽寒
蕪看書熬秋籜信口亦吟哦放心無適莫君恩已絕望
人事終難度相府一張紙喚起久屈蠖誠知有梁柱未
忍棄棖桷五城天上開三殿雲間卓重取正衣冠籠裏
山獐獍病翼得風雲壞牆勞楮堊諫官與史氏舊職聊
羈絡舉袖拂石螭凝眸睨金雀冥心想前事一夢何揮
霍長恐先生聞倚松成大喙關中朋友來遺我神仙作
繁華遠容綺錚鏦美金錯古澹啜鉶羹大雅鏗木鐸千

言距百韻旨趣何綽綽孰念氣如虹翻然輕抵鵲俊甚
麻姑爪快比屠門嚼渾金豈在鎔尺璧寧施琢愈風齊
捧檄忘味同聞樂置之向懷袖日夕芬蘭若裊我塵俗
韻鉛刀化干鎔同聲必有應過實還疑謔盛夸山中事
雲屋張霞幕蘭茝含露採石髓和煙酌巢由泉滌耳園
綺芝盈握有時上絕頂星斗近可摸下視塵世人營營
似蟲螻男兒既束髮出處岐路各苟非秉陶鈞即去持
矛槊致主比唐虞安邊如衛霍不爾為逸人深居返吾

朴胡然自碌碌名節亦銷爍行年過半世功業無圭勺
無術鑄五兵使民興錢鑄無才統六師逐寇開沙漠空
言說王道肆目看人瘼多慚指佞草虛效傾心藿一覽
大雅文起予亦何博况茲山野性謨畫昧方畧搔首謝
朝簪行將返耕鑿

不見陽城驛

并序

余為兒童時覽元白集唱和陽城驛詩時稔貶江陵
過南山感陽道州而作是詩也且改驛為避賢郵不

忍呼其諱也樂天在翰林得而和之又見杜紫薇富
水驛詩題下解云富水驛舊名與陽諫議同卒章曰
驛名不合輕移改留警朝天擁傳人淳化二年九月
余自西掖左官商於訪其驛則無有也檢之圖經求
之郡境則富水地存而驛廢陽城之號遂莫知矣因
作古風詩申明三賢之作且以不見陽城驛為首句
至於道州之行事元詩盡之矣此不復云

不見陽城驛空吟昔人詩誰改避賢郵唱首元微之微

之謫江陵顓頊為判司路道商山驛一夕見嗟咨所嗟
陽道州抗直貞元時時亦被斥逐南荒終一麾題詩改
驛名格力何高奇樂天在翰林亦和遷客詞遂使道州
名光與日月齊是後數十年借問經者誰留題富水驛
始見杜紫薇紫薇言驛名不合輕改移欲遣朝天者惕
然知在茲一以諱事神名呼不忍為一以名警衆名存
教可施為善雖不同同歸化之基邇來又百稔編集空
鱗差我遷上洛郡罪譴身繫維舊詩猶可誦古驛殊無

遺富水地雖在陽城名豈知空想數君子貫若珠累累
三章詩未泯千古名亦垂德音苟不嗣吾道當已而前
賢尚如此今我復何悲題此商於驛吟之聊自怡

竹飀

商嶺多脩篁蒼翠連山谷有鼠生其中薦食無厭足春
筍齧生犀秋筠折寒玉飫飽致肥腴優游恣蕃育林密
鶩不攖穴深犬難逐鳳凰餓欲死彼實無一掬唯此竹
間飀琅玕長滿腹暖戲綠叢陰舉頭傲鴻鵠不知商山

民愛爾身上肉有鍾利其鋒有錐銛於鏃開穴窟如因
洞胸聲似哭膏血尚淋漓攜來入市鬻竹也比賢良鼠
兮類商俗所食既非宜所禍誠知速吁嗟狡小人乘時
竊君祿貴依社樹神俸盜太倉粟笙簧佞舌鳴藥石嘉
言伏朝見秉大權夕聞罹顯戮李斯具五刑趙高夷三
族信有司殺者在暗明如燭彼狡無害賢彼鼠無食竹

聞鵲

有序

滁淮地也郡堞之上鵲鵲巢焉永夕鳴嘯不已妻子

驚死或終夜不寐因作詩喻之

元精自萬彙羽族何茫茫為怪有鷓鴣為瑞稱鳳凰
鳳不時出未識五色章吾生在鄒魯風土殊遠方鳴鳩
隨乳燕日夕巢吾梁翩翩雜鳥雀比屋率為常又從笙
仕來五年居帝鄉更直入承明侍宴夜未央上林聞鶯
囀巧舌如笙簧鷓鴣徒知名聞見實未嘗頃年謫商山
聽之已悲涼今茲出內庭罰郡來永陽誰知爾鷓鴣營
巢在城牆年加睡漸少秋盡漏且長鳴嘯殊不已歷歷

含微霜孺人泣我右稚子啼我傍吾心非達士詎免亦
悵悵人生縱百歲忽若石火光其間有窮通幽昧難自
量我愛臯與夔我冠虞舜堂簫韶聞九成丹穴來鏘鏘
又愛閔與散陳力遇文王鸞鸞聽岐山多士周道昌嗟
嗟漢賈誼年少謫南荒故有鵬鳥賦倚伏理甚詳郇公
暨鄴侯放逐同一邦夜深聞此鳥韋公涕沾裳李侯舉
酒令斯音非不祥坐客如不聞罰之以巨觴遂使惡聲
鳥聽之無所傷

天寶中韋郇公謫守蘄州時李鄴侯亦
以處士放逐因夜飲聞鵩鸞韋公泣下

李公曰此烏人以為惡其聲可聽乃令坐客
有不聞其聲者罰以大杯由是聽之不厭
贊皇貶袁

州懷鶚義亦臧

李太尉有懷鶚賦

乃知音賢哲未免亦悽惶况

余不肖者邀寵在朝行報國惟直道謀身昧周防四年
兩度黜鬚髮已蒼蒼雖得五品官銷盡百鍊鋼何當解
印綬歸田謝膏粱教兒勤稼穡與妻甘糟糠鳳來非我
慶鶚集非我殃優游盡天年身世俱可忘

和楊遂賀雨

我罷內廷職出臨永陽民永陽民雖庶未免多饑貧富

之既無術齷齪為謹身不堪今夏旱如燎復如焚厥田
本塗泥坐見生塵氛稚老無所訴嗷嗷望穹旻食祿憂
人憂蚤夜眉不伸從決獄中囚徧禱境內神楚辭有山
鬼廟貌羅水濱佛法有浮圖寺宇連城闡齋莊命寮窠
供給抽俸緡鼓笛迎湫水香花照金輪誠知非典故且
慰旱爇人偶與天雨會滂沱四郊勻揀秧復修堰野叟
何欣欣可辦官府調亦免農艱辛熨調賴時相感應由
聖君於吾復何有敢望歌頌云清流揚水部德與我為

鄰仇香官位屈何遜詩格新見投賀雨詩言自人口聞
夫君益私我過寶豈相親為霖非我事職業惟詞臣若
有民謠起當知帝澤春庶使採詩官入奏助南薰

對雪示嘉祐

去年看雪在商州使君命我山寺頭峯巒草樹六百里
饑飈凍鳥聲啾啾山城窮陋無妓樂何以銷得騷人愁
抱竝自瀉不待勸乘興一引連十甌晚歸上馬頗自適
狂吟醉舞夜不休今年看雪在帝里瑤臺瓊樹佳氣浮

朝回攬轡聊四望移下五城十二樓樽中有酒翻不飲
鬱鬱不快非怨尤吾兒嬌驕未曉事問我胡不私獻酌
因令把筆寫我意為渠吟作雪中謳昔為副使不理事
待罪且免憂人憂今為諫官非冗長拾遺三館俸入優
秋來連澍百日雨禾黍颺溺多不收如今行潦占南畝
農夫失望無束斲爾看門外饑餓者往往殍殍填渠溝
我冠旅進又旅退曾無一事裨皇猷俸錢一月數家賦
朝衣一襲幾人裘安邊不學趙充國富民不作田千秋

胡為碌碌事文筆歌時頌聖如俳優一家衣食仰在我
縱得飽暖如狗偷況我眼昏頭漸白安能隱几勤校讐
何時提汝歸田去賣馬可易數隻牛深耕淺種苟自給
藜羹豆粥充饑喉黍畦鋤理學元亮瓜田澆灌師秦侯
素餐免作疲人蠹開卷免對古人羞未行此志吾戚戚
對酒不飲抑有由斯言不敢向人道語爾小子為詒謀
和馬中允爐邊偶作

誰為東君掌青律故將春日連人日春日雨絲暖融融

人日雪花寒慄慄雨雪寒暖苦不同可比交情去就中
仲咸擁爐發歌詠古風激破澆漓風人情離合古來有
召公初亦疑周公汾陽臨淮本仇隙一旦分兵若親戚
四公翻覆人不譏各各操心為邦國此外譎張多為已
反掌背面如千里張耳陳餘不忍言魏其武安何足齒
我愛中允君子心心與人交淡如水別有人間勢利徒
一去一就隨榮枯西漢董賢方倭倖孔光迎拜卑如奴
是時揚雄在東觀投閣欲死無人扶有唐力士夫人死

朝士執喪如喪妣是時李白放江邊憔悴無人供酒錢
小人之性何所似真如蜂蝶并螻蟻尋香逐臭苟朝昏
豈願松篁與蘭茝重君擔心一何極澗底松兮陵上栢
澗松陵栢有朽時我約君心無改易

拍板謠

麻姑親採扶桑木鏤脆排焦其數六雙成捧立王母前
曾按瑤池白雲曲幾時流落來人間梨園部中齊管絃
管絃纔動我能應知音審樂功何全吳宮女兒手如筍

執向玳筵為樂準數聲慢仙人屐齒下雲棧老狐臘月
渡黃河緩步輕輕踏冰片數聲急空江電打漁翁笠鮫
人泣對水晶盤滿把珠璣連瀉入劃然一聲送曲徹由
基射透七重札金罍冷落聞無聞隴頭凍後泉聲絕律
呂與我數自齊絲竹望我為宗師總驅節奏在術內歌
舞之人無我欺所以唐相牛僧孺為文命之為樂句

筵上狂詩送侍棊衣襖天使

昔事先皇叨近侍北門西掖華清地太宗多材復多藝

萬幾餘暇翻棊勢對面千里為第一獨飛天蛾為第二
第三海底取明珠三陣堂堂皆御製中侍宣來示近臣
天機秘密通鬼神乃知棊法通軍法既戒貪心又嫌怯
惟宜靜勝守封疆不樂窮兵用戈甲先皇三勢有深旨
豈獨一枰而已矣當時受賜感君恩藏於篋笥傳子孫
至道年中出滁上失脚青雲空悵望移典維揚日望還
軒轅鼎成飛上天龍髯忽斷攀不得舊朝衣上淚潸潸
吾皇曲念先朝物徵歸再掌西垣筆悲涼忽見紅藥開

哭臨空隨梓宮出去年領郡得齊安山州僻陋在江干
黃民誰識舊學士白頭猶任老郎官昨日江邊天使到
隨例霑恩著衣襖皇華本是江南客久侍先皇對棊奕
筵中偶說當年事三勢分明皆記得我從失職別上臺
御書深鎖不將來遙想棊圖在私室天香散盡空塵埃
今日因君聊話及翻作停杯向隅泣人生不易逢聖朝
君恩未報雙鬢凋金鑾殿花春灼灼永熙陵樹夜蕭蕭
空歎拖腸在泥土不如舐鼎升煙霄多病相如猶未死

追思往事欲魂消
星使今辰迴馬首
彊對離筵滿傾酒
悲歌一曲從事書
唱與朝中舊知友

還楊遂蜀中集

上蒼茫昧胡為乎
施設吾道生吾徒
否多泰少是天意
生有迷作死不虛
聖人憂患方演易
賢者窮愁始著書
盡令富貴陷逸樂
蠢蠢戢戢如雞猪
泯然無物作時瑞
誰識鳳凰與騶虞
經史子集燦今古
粉繪帝道張皇謨
一言可採即不朽
名姓張與日月俱
乃知天心厚我輩

窮辱不足形悲呼夫君擢秀在江左國小而逼何區區
科名始得值兵火金陵坐見成丘墟入朝纔得一贊善
黜降重為縣大夫彰明僻遠在蜀道又遇祆賊攻成都
徒行抱印向隴氏乞食村落何崎嶇歸來朝責作主簿
朱衣黯淡鬢毛疎昨朝投我蜀中作錚然一集如瓊琚
杜甫遭竄吟不輟庾信悲哀情有餘我逢聖代自多難
謾誇三入承明廬近令編綴小畜集文筆詩賦何紛如
才名官職不兩立真宰析刻分毫銖郎官疎遠既未貴

縣吏禮數不足拘相逢且說文章樂為君酌酒焚枯魚

成武縣作

釋褐來成武初官且自彊位卑松在澗俸薄葉經霜雨
菌生書案饑禽啄印牀猶驚寫秋卷枕砌落花黃

除夜寄羅評事同年

歲暮洞庭山知君思浩然年侵曉色盡人枕夜濤眠移
櫂風搖浪開牕雪滿天無因一乘興同醉太湖船

五更睡

數載直承明寵深還若驚起朝雞喚起殘夢馬馱行左
宦離雙闕高眠盡五更如將閒比貴此味敵公卿

寧公新拜首座因贈

著書新奏御優詔及禪扉首座名雖貴家山老未歸
磬聲寒繞枕塔影靜侵衣終憶西湖上秋風白鳥飛

寄礪山主簿朱九齡

忽思蓬島會羣仙二百同年最少年利市欄衫拋白紵
風流名紙寫紅牋歌樓夜宴停銀燭柳巷春泥污錦韉

今日折腰塵土裏共君追想好淒然

寄金鄉張贊善

年少辭榮自古稀朝衣不著著斑衣北堂侍膳侵星起
南畝催耕冒雨歸種竹野塘春筍脆採蘭幽澗露芽肥
伊余自是徒勞者未得同尋舊釣磯

遊虎丘山寺

寺牆圍著碧孱顏曾是當年海湧山盡把好峯藏院裏
不教幽景落人間劍池草色經冬在石座苔花自古斑

珍重晉朝吾祖宅一回來此便忘還

寄潤州趙舍人 二首

南徐城古樹蒼蒼衙府樓臺盡枕江
甘露鐘聲清醉榻
海門山色滴吟牕
直廬久負題紅藥
出鎮何妨擁碧幢
聞說秋來自高尚
道裝筇竹鶴成雙

記言彩筆罷摛華
郡閣高閒似道家
琴院坐聽江寺磬
郡樓吟見海山霞
春園遺母親燒筍
夜榻留僧自煮茶
應笑陶潛未歸去
折腰奔走在泥沙

寄毗陵劉博士

毗陵古郡接江堧赴任琴書共一船
下岸且尋甘露寺到城先問惠山泉
秋蟾吐檻供吟興野鶴偎牀伴醉眠
官散道孤詩筆老不應雙鬢更皤然

中元夜宿餘杭山仙泉寺留題

祭廟迴來畧問禪
蘚牆沙徑碧山前
風疏遠磬秋開講
水響寒車夜救田
藍綬有香花菡萏
竹牕無寐月嬋娟
自慚政術貽枯旱
恐臥松陰漱石泉

再泛吳江

二年為吏住江濱，重到江頭照病身。
滿眼碧波輸野鳥，一蓑疎雨屬漁人。
隨船曉月孤輪白，入座晴山數點青。
張翰精靈還笑我，綠袍依舊惹埃塵。

和郡寮題李中舍公署

樹影池光映曉霞，綠楊陰下吏排衙。
閒拖屐齒妨橫筍，靜拂琴牀有落花。
地脈暗分吳苑水，厨煙時煮洞庭茶。
青宮詞客多閒暇，按曲飛觴待歲華。

題張處士溪居

雲裏寒溪竹裏橋，野人居處絕塵囂。
病來芳草生漁艇，睡起殘花落酒瓢。
閒把道書尋晚迳，靜攜茶鼎洗春潮。
長洲懶吏頻過此，為愛盤餐有藥苗。

送羅著作奉使湖湘

使星躔次入長沙，曉別延英去路賒。
數刻漏中承密旨，幾重湖外奉皇華。
山行馬拂湘川石，寺宿僧供嶽麓茶。
迴日期君直西掖，當階紅藥正開花。

送馮學士入蜀

錦川宜共少年期四十風情去未遲
蠹市夜歌歌枕處峨眉春雪倚樓時
休誇上直吟紅藥多羨乘軺聽子規
莫學當初杜工部因循不賦海棠詩

賀將作孔監致仕

泣辭明主竟抽簪便約幽雲老舊林
朝請罷來頻典笏田園歸去只攜琴
焚香靜院當山色晒藥空庭避竹陰
一子得官三品祿未饒疏傳有黃金

和陳州田舍人留別

演綸多暇每封章暫去頒條道更光
郡吏好排紅粉妓使君曾是紫薇郎
樓臺有月新詩出囹圄無人綠草長
地接清淮足佳致水村煙塢是魚鄉

回襄陽周奉禮同年因題紙尾

武關西畔路巉巖兩月勞君寄兩緘
鏡裏想添新白髮篋中猶貯舊青衫
扶頭酒好無辭醉縮項魚多且放饒
譬似元和張太祝十年不改舊官銜

寒食

今年寒食在商山山裏風光亦可憐
稚子就花拈蛺蝶人家依樹繫鞦韆
郊原曉綠初經雨巷陌春陰乍禁煙
副使官閒莫惆悵酒錢猶有撰碑錢

南郊大禮詩

二首

聖君重卜祀南郊仗擁黃麾間白旄
仙吹冷翻蒼玉佩曉霞晴透絳紗袍
天開堯率齋宮靜海湧蓬萊帳殿高
遷客生還知有望商山不敢讀離騷

嚴裡禮退一陽生
抃賀歡呼動四溟
聖壽久長南至日
寶圖高大北辰星
九重城闕天將曙
百萬人家戶不扃
知有化工無棄物
海波分細一浮萍

新秋即事

宦途流落似長沙
賴有詩情遣歲華
吟弄淺波臨釣渚
醉披殘照入僧家
石挨苦竹旁抽筍
雨打戎葵臥放花
安得君恩許歸去
東陵閒種一園瓜

前賦村居雜興詩二首間半歲不復省視因長男

嘉祐讀杜工部集見語意頗有相類者咨於余
且意余竊之也余喜而作詩聊以自賀

命屈由來道日新詩家權柄敵陶鈞任無功業調金鼎
且有篇章到古人本與樂天為後進敢期子美是前身
從今莫厭閒官職主管風騷勝要津

贈衛尉宋卿二十二丈

謫宦歸來髮更斑徊翔猶得寺卿閒幾多僚友三台上
大半生徒兩制間舊賜錦袍多貰酒新裁紗帽欲歸山

東垣小諫龍鍾甚空媿洪爐蚤鑄顏

送融州任巽戶曹撰越王愛姬墓誌得罪

御前曾取好科名一掾如何萬里行身落蠻方人共惜
罪因文學自為榮吏供版籍多魚稅民種山田見象耕
君看咸通十司戶投荒終久是公卿

幕次閒吟

江離吟盡鬢成霜謫宦歸來夢一場每日祇窺丹鳳案
被人猶喚紫薇郎齋宮獨坐風翻幕客舍閒吟葉滿牀

若是承明客再入未曾荒廢舊文章

送張監察通判餘杭

郡城瀟灑浙江濱暫輟乘驄慰遠民
莫放霜威誇御史且收風景屬詩人
雪侵樓上迎潮眼花擁湖中泛月身
盡是公餘吟咏處好飛佳句寄詞臣

書齋

年年賃宅住閒坊也構幽齋作道裝
守靜便為生白室著書兼是草玄堂
屏山獨臥千峯雪御札時開一炷香

莫笑未歸田里去宦途機巧盡能忘

滁州官舍

忽從天上謫人間知向山州住幾年
俸外不教收果實公餘多愛入林泉
朝簪未解雖妨道宦路無機即是禪
鈴閣悄然私自問郡齋何異玉堂前

臘月

臘月滁州始覺寒年豐歲暮郡齋閒
官供好酒何憂雪天與新詩合看山
日照野塘梅欲綻燒迴荒徑草猶斑

吏人散後無公事門戟森森夕鳥還

寄杭州昭慶寺華嚴社主省常上人

夢幻吾身是偶然勞生四十又三年任誇西掖吟紅藥
何似東林種白蓮入定雪龕燈焰直講經霜殿磬聲圓
謫官不得餘杭郡空寄高僧結社篇

歲暮感懷

歲暮山城放逐臣老從霄漢委泥塵公卿別後全無信
兄弟書來祇說貧眼看青山休未得鬢垂華髮摘空頻

文章氣概成何事
霑惹虛名誤此身

芍藥詩

牡丹落盡正淒涼
紅藥開時醉一場
羽客諳傳尸解術
仙家重熱返魂香
蜂尋檀口論前事
露濕穠英試曉粧
曾忝掖垣真舊物
多情應認紫薇郎

贈省欽師

師善八分書太宗召於
殿上書數行得賜紫衣

舊隱何年別翠微
瀑泉聲外鎖禪扉
御前能寫八分字
天上曾宣三事衣
燈照夜寒霜後冷
鼎烹秋菌雨中肥

終歸五老峯邊去
杯渡長江一錫飛

贈狀元先輩孫僅

病中何事忽開顏
記得詩稱小狀元

余淳化辛卯歲贈君詩云明年再就

堯階試應被
人呼小狀元

粉壁乍懸龍虎榜
錦標終屬鵲鴿原
青雲

隨步登花塔
紅雪飄衣醉御園
還有一條遺恨處
不教

英俊在吾門

謫居感事

一百六十韻
內綏字維字俱重押

遷謫獨熙熙
襟懷自坦夷
孤寒明主信
清直上天知
消

息還依道生涯只在詩惟當喻山木詎敢詠江蘿偶歎
勞生事因思志學詩讀書方覩奧下筆便搜奇賦格驚
鸚鵡儒冠薄鷄鵠耕桑都不事園井未曾窺必欲縑緡
富寧教杼軸紕光陰常矻矻交友盡惻惻步驟依班馬
根源法孔姬收螢秋不倦刻鵠夜忘疲流輩多相許時
賢亦見推叨榮偕計吏濫吹謁春司僕瘦途中病驢寒
雪裏騎空拳入場屋拭目看京師技癢初調箭鋒銛欲
試雖甲科登漢制

太平興國八年
余首中甲科

內殿識堯眉數刻愁

晡矣三題亦勉之先鳴輸俊彥上第遂參差罷舉身何
託還家命自奇惟慚親倚戶敢望嫂停炊竭力求甘旨
終朝走路岐貧希仲由米多廢董生帷丹桂何時折孤
蓬逐吹移知憐無國士志氣自男兒季子貂裘敝狂生
刺字藁廣場重考覆塞步載驅馳明代寧甘退青雲暗
有期禮闈冠多士御試拜丹墀澤霧寧慚豹搏風肯伏
雌重瞳念孤迹一第忝鴻私得告還鄉貴除官佐邑卑
折腰稱小吏矩步慎初資

解褐得
主簿

枳棘心何恨松筠操

自持及親家有養事長禮無虧銅墨官常改煙霄雨露

垂縣花聊主管寺棘且羈縻

九年授大理評事
知蘇州長洲縣

吳郡包

山側長洲巨海湄萬家呼父母百里撫惇嫠敢起徒勞

歎長憂竊祿嗤宦途甘碌碌官業亦孜孜政事還多暇

優游甚不羈村尋魯望宅寺認館娃基西子留香逕吳

王有劍池狂歌殊不厭酒興最相宜草織登山履蒲紐

平挽舫綏果酸嘗橄欖花好揀醪醕震澤柑包火松江

鱸縷絲三年無異政一篋有新詞多戀南園臥俄從北

闕追

雍熙四年奉召赴闕

呈材真樸檄召對立茅茨載筆居三館

登朝忝拾遺紫泥天上降朱紱御前披侍從殊為貴圖

書頗自怡史才媿班固諫筆謝辛毗擬把微軀報慚將

厚祿尸安邊上章疏端拱獻歲規精鑒逢英主心知是

伯夔

余論邊事特為趙許公所器

賡歌才不稱掌誥筆難摛

是歲蒙上召余

殿上作歌遂有西掖之拜

制厯多無事

閣下有制厯當直舍人如無除目書名而出

詞頭

每怯遲繁陰温室樹清吹萬年枝青鎖霞光透蒼苔露

片萎御香飄硯席宮葉落纓綉看浴池心鳳閒捫殿角

螭上林花掩映仙掌露淋漓對近瞻旒冕班清辟虎貌

宮簾垂翡翠御水動漣漪紀號年淳化朝元月建寅

叶移

攝官捧寶冊祝壽執樽彝表案行低折

時余又押諸芳表案

宮懸

聽肅祇德音王澤潤謙柄斗杓移貴接臯夔步深窺龍

鳳姿策勲何炫赫賜紫更姜蕤

是日加柱國謝日面賜金紫

蚊力山

難負鵜梁翼易滋論功慙八柱受服欲三褫

音遲

祇慮殃

將至曾無事可禪趨朝空俯偃退食自逶迤更直當春

好橫行隔宿咨

每休假三日後謂之橫行於正衙參假院吏隔夜報

內朝長得對

駕幸每教隨瓊苑觀雲稼金明開水嬉賞花臨鳳沼侍

釣立魚坻拂面黃金柳醅顏白玉卮分題宣險韻翻勢

得仙碁

上嘗賜兩制碁勢圖

竟舉窺天管爭燃煮豆其恨無才應

副空有表虔祈

每有御製詩韻難并新碁勢但上表免和訴不曉而已

睿睠偏稱

賞天顏極撫綏中官賜文字院吏捧巾綦遭遇誠堪惜

功名竊自思請纓無壯志視草亦胡為未獻東封頌空

鑄北嶽碑深慚專俎豆長欲議邊陲但可懷驕子何須

斬谷蠡胸中貯兵甲堂上有熊羆成敗觀千古弛張在

四維兼磨斷佞劍擬樹直言旗遇事難緘默平居疾喔

咿無權逐鳥雀俛首任狐狸廷尉專刑殺

以制誥舍人兼大理寺事

詞臣益等衰五花儀久廢三尺法聊施書命猶無詔評

刑肯有欺厚誣凌近侍內亂疾妖尼

妖尼道安誣告徐騎省

丹筆

當無赦金科了不疑拜章期悟主仆法更防維萋菲終

無已雷霆遂赫斯如弦傷訐直投杵覓瑕疵衆鑠金須

化羣排柱不支佞權迴北斗讒舌簸南箕闕下羊腸險

朝端虎尾危道孤貽衆怒責薄賴宸慈西掖除三字南

山佐一麾蒼黃塵滿面揮灑淚交頤目斷九重闕魂銷
八達衢尊親遠扶持兄弟盡流離秦嶺偏巉絕商於更
嶮巖吾廬何處是我馬忽長辭六里山蒼翠丹河浪渺
瀰分封思魏鞅割地憶張儀懶讀三閭傳空尋四皓祠
畚煙濃似瘴松雪白如梨壞舍牀鋪月寒牕硯結澌振
書衫作拂解帶竹為梳呼僕泥茶竈從僧借藥篩鐘愁
上寺起角怨水門吹舊友誰青眼新秋出白髭煙嵐晴
鬱鬱風雨夜颼颼我過徒三省吾生自百罹初來聞旅

雁不覺見黃鸝市井攜山菜房廊蓋木皮

商州民多以木皮蓋屋

野花紅爛縵山草碧穠穠副使官資冷商州酒味醅尾
因求食掉角為觸藩羸有夢思紅藥無心採紫芝瘦妻
容慘戚稚子淚連沍暖怯蛇穿壁昏憂虎入籬松根然
夜燭山蕨助朝饑豈獨堂虧養還憂地乏醫跡飄萍渤
海親老日崦嵫閣下辭巢鳳山中伴野麋風欺秀林木
雲隔向陽葵屈產遭駑馬丹山困嚇鷗悔須分黑白本
合混妍媸自此藉餘及終當學鈍鉗窮通皆有數得喪

又奚悲自顧才何有空憐道在茲宣尼猶削伐大禹亦
胼胝運去當如鼠投來且禦魑避風聊戢翼得水會揚
馨琴酒圖三樂詩章效四虫

白公有
四虫詩

魚須從典賣貂尾

任傾歌兀兀拖腸鼠悠悠曳尾龜北牕尋蛺蝶南岸看
鷓鴣山翠樓頻上雲生杖獨楮簟閒留曉魄簷暖負冬
曦松柏寒仍翠瓊瑤涅不緇望誰分曲直祇自仰神祇
吾道寧窮矣斯文未已而狂吟何所益孤憤洩黃陂

商山海棠

錦里名雖盛商山豔更繁別疑天與態不類土生根淺
著紅蘭染深於絳雪噴待開先釀酒怕落預呼魂香裏
無勑敵花中是至尊桂須辭月窟桃合避仙源浮動冠
頻側霓裳袖忽翻望夫臨水石窺客出墻垣贈別難饒
柳忘憂肯讓萱輕輕飛燕舞脈脈息嬌言蕙陋虛侵選
梨凡浪占園論心留蝶宿低面厭鶯喧不忝神仙品何
辜造化恩自期栽御苑誰使擲山村綺季荒祠畔仙娥
古洞門煙愁思舊夢雨泣怨新婚畫恐明妃恨移同卓

氏奔祗教三月見不得四時存繡被堆籠勢臙脂浥淚
痕貳車春未去應得伴芳罇

茶園十二韻

勤王修歲貢晚駕過郊原蔽芾餘千本青蔥共一園牙
新撐老葉土軟迸新根古小侔黃雀毛獐摘綠猿出蒸
香更別入焙火微溫採近桐花節生無穀雨痕緘滕防
遠道進獻趨頭番待破華胥夢先經閭闔門汲泉鳴玉
甃開宴壓瑤罇茂育知天意甄收荷主恩沃心同直諫

苦口類嘉言未復金鑾召年年奉至尊

山僧雨中送牡丹

數枝香帶雨霏霏雨裏攜來叩竹扉擬戴却休成悵望
御園曾插滿頭歸

春居雜興

雨株桃杏映離斜妝點商山副使家何事春風容不得
和鶯吹折數枝花

杏花 三首

暖映垂楊曲檻邊
一堆紅雪罩春煙
春來自得風流伴
榆莢休拋買笑錢

長愁風雨暗離披
醉遶吟看得幾時
只有流鶯偏稱意
夜來偷宿最繁枝

陌上紛披枝上稀
多情猶解撲人衣
雙成灑道迎王母
十里濛濛絳雪飛

別丹水

曾經爛漫濯吾纓
恁別潺湲月夜聲
便入紅塵染詩思

吟魂猶合數年清

芍藥開花憶牡丹

風雨無情落牡丹
翻階紅藥滿朱欄
明皇幸蜀楊妃死
縱有嬪嬙不喜看

后土廟瓊花詩 二首

揚州后土廟有花一株潔白可愛樹細而花繁
不知實何木也俗謂之瓊花因賦詩以狀其態
誰移琪樹下仙鄉
二月輕冰八月霜
若使壽陽公主在

自當羞見落梅妝

春冰薄薄壓枝柯
分與清香是月娥
忽似暑天深澗底
老松擎雪白婆娑

曹緯

見鄭文寶集有送曹緯劉鼎二秀才
詩其弟即元寵也緯詩文名秋浦集

山行

日出過山頭
日入宿山下
我行山亦行
隱隱似奔馬
朝昏山送迎
山意自傾寫
借問征途間
誰如此山者

自齊山借舟泛湖還家

十里平湖漫不流
晚風吹浪打行舟
定知歸得侵燈火
家在菰蒲最盡頭

曹組

字元寵，緯之弟也。兄弟俱以文名。組六舉不第，著鐵硯篇以自見。後有寵於徽宗，授睿思殿待制。

夜歸曲

鷓鴣啞啞啼暮寒
回風急雪飄朱闌
瑣牕繡閣艷紅獸
書幙金泥搖彩鸞
吳妝秀色攢眉綠
能唱襄陽大堤曲

酒酣橫笛咽孤吹裂柯亭傲霜竹遠空寒雪渾不動
老狐應被黃河凍暗回微暖入江梅何處荒榛挂么鳳
歸來穩跨青連錢貂耳擁鼻行翩翩籠紗密炬照飛霞
十二玉樓人未眠

李至

字言幾真定人生七歲而孤育於飛龍使李知審
家幼沈靜好學屬文典贍舉進士授將作監通判
鄂州擢著作郎遷右補闕知制誥歷翰林學士參
知政事雍熙初議親征范陽至上疏力止聞者趨
之以目疾累表求解機政進秩吏部會建秘閣命
兼秘書監總三館書至道初詔太子師事之真宗

即位拜工部尚書參知政事咸平元年復以目疾
求解政授武信軍節度使知河南府卒年五十五


贈侍

中

桃花犬歌

宮中有犬桃花名絳繒圍頸懸金鈴先皇為愛馴且異
指顧之間知上意珠簾未卷扇未開桃花搖尾常先至
夜靜不離香砌眠朝饑祇傍御牀餒彩雲路熟不勞牽
瑤草風微有時吠無何軒后鑄鼎成忽遺弓劍棄寰瀛
迢迢松闕伊川上遠逐龍輜十數程兩皆漣漣似垂淚

骨見毛寒頓憔悴萬人見者倍傷心
微物感恩猶若是韓盧備獵何足嘉
西旅克庭豈為瑞聞君奉詔修實錄
一字為褒應不曲白魚赤雁且勿書
願君書此懲浮俗



宋元詩會卷二